

Qaanaami, Illoqqortoormiuni, Taasilami taakkualu nunaqarfiini nannunik aarrinik qilalukkanillu piniarnerup killilersorneqarunnaarsinnaanera, nunatta nunanik allanik isumaqatigiissutaasa pisussaaffiliinerisa iluani, periarfissaanersoq misissoqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut

(Saqq. Inatsisartunut ilaasortaq Lars Mathæussen, Siumut)

pillugu

Aalisarnermut Piniarnermut Nunalerinermullu ataatsimiititaliap

ISUMALIUTISSIISUTAA

Siunnersuutip aappaassaaneerneqarnerani saqqummiunneqartoq.

Ataatsimiititaliami suliaqarnermi ilaasortat uku peqataapput:

Inatsisartunut ilaasortaq Nikolaj Jeremiassen, Siumut, siulittaasoq

Inatsisartunut ilaasortaq Karl-Kristian Kruse, Siumut, siulittaasup tullia

Inatsisartunut ilaasortaq Saxtorph Didriksen, Siumut

Inatsisartunut ilaasortaq Knud Kristiansen, Atassut

Inatsisartunut ilaasortaq Aqqaluaq B. Egede, Inuit Ataqtigiit

Inatsisartunut ilaasortaq Ane Hansen, Inuit Ataqtigiit

Inatsisartunut ilaasortaq Hans Enoksen, Partii Naleraq

UPA 2014-imi ull. 8. maj 2014 siullermeerereernermi siunnersuut Ataatsimiititaliap misissorpaa.

Siunnersuutip imaa aamma siunertaa

Qaanaami, Illoqqortoormiuni, Tasiilami taakkualu nunaqarfiini nannunik, aarrinik qilalukkanillu piniarnerup killilersorneqarunnaarsinnaanera, nunatta nunanik allanik isumaqatigiissutaasa pisussaaffiliinerisa iluani, periarfissaanersoq misissoqqullugu Naalakkersuisut peqquneqarnissaannik siunnersuuteqartup aalajangiiffigisassatut siunnersuutikkut kissaatigaa.

Piniartut inuussutissarsiummi periarfissaasa pitsanngornissaannik kissaateqarneq, aamma nannut amerliartortut Tunumi innuttaasunut sillimaniarnikkut annertunerujartortumik unammilligassaanerat innersuussutigalugit siunnersuut tunngavilersorneqarpoq.

Siunnersuutip Inatsisartuni siullermeerneqarnera

Siullermeerinermi siunnersuut partiit amerlanerussuteqartut tapersersorpaat, peqatigitillugulu siunnersuutip Ataatsimiititaliamut innersuunneqarnissaa partiit kissaatigivaat.

Ataatsimiititaliap siunnersuummik suliaqarnera

Nannunik, aarrinik, qilalukkanik qernertanik qaqortanillu ingerlatsinermik aqutsinermut nunat tamalaat isumaqatigiissutaat tunngavigineqartartut Ataatsimiititaliap paasivaa.

Uumasoqatigiiaanut qulaani pineqartunut maanna pisassiissuteqartarnerup atorunnaarsinneqarniarnera Kalaallit Nunaata nunanut tamalaanut pisussaaffiitut ataqatigiissinneqarsinnaanngitsoq Naalakkersuisut isumaqartut Ataatsimiititaliap paasivaa.

Kalaallit Nunaata nunanut tamalaanut pisussaaffiitut killiliussat iluanni pisassiissutit atorunnaarsinneqarsinnaanerannik Naalakkersuisut sukumiinerusumik misissuinissaat naalakkersuinikkut ingerlatalit amerlanerussuteqartut kissaatigisimagaat Ataatsimiititaliap maluginiarpa.

Naalakkersuisut naliliinerannut assortuinissamut Ataatsimiititaliaq pissutissaqanngilaq, taamaattumilli Kalaallit Nunaata nunanut tamalaanut pisussaaffii – tamatumanilu Kalaallit Nunaannut atatillugu nunat tamalaat isumaqatigiissutaannit periarfissat killiliussallu - pillugit Inatsisartut takussutissiamik sukumiinerusumik tigusaqarsinnaappata tamanna iluaqutaasinnaassasoq Ataatsimiititaliaq isumaqarpoq. Taamatut misissuinikkut taamaalilluni ilaatigut Inatsisartuni oqallinneq ataatsimoortumik tunngaveqarluni ingerlanneqalersinnaassaaq.

Tamatumunnga atatillugu Ataatsimiititaliap naqissuserusuppaa, Ataatsimiititaliaq isumaqarluinnarmat nannut, aarrit, qilalukkat qernertat qaqortallu killilersorneqarnerisa atorunnaarsinnissaannut aalajangiiffigisassatut siunnersuut Naalakkersuisunut pisussaaffiliinngimmat, taamaallaalli tamatuma periarfissaqarnera misissoqquneqarmat.

Peqatigitillugu Ataatsimiititaliap oqaatigerusuppaa, nannut, aarrit aamma qilalukkat qernertat qaqortallu pillugit nalunaarutit atuuttut arlallit pisoqaammata, taamaattumillu Ataatsimiititaliap isumaa malillugu ullutsinnut naleqqukkunnaarsimallutik. Taamaalilluni Ataatsimiititaliaq misigisimavoq, pissutsinut maanna atuuttunut aamma nunap immikkoortortaanut pissutsinut naleqquttumik aamma ilaatigut silap allanngornera pissutaalluni piniarnerup aallaaniarnerullu ingerlanneqarsinnaanerannut periarfissat allanngornerisigut nalunaarutit naammattumik tikkuussinngitsut.

Taamaalilluni Ataatsimiititaliap inassutigissavaa, siunissami piniartunut pitsaanerpaamik

sinaakkutissiiniarneq siunertaralugu nalunaarutit attuumassutillit tamarmik piaarnerpaamik annertunerusumik aaqqissuuteqqinneqassasut.


Qulaani pineqartut innersuussutigalugit aalajangiiffigisassatut siunnersuummut annertunerusumik oqaaseqaateqarnissamut Ataatsimiititaliaq pissutissaqarsorinngilaq.


Ataatsimiititaliap inassutai


Ataatsimiititaliap isumaqatigiittup isumaliutissiisummi oqaasertaliussatut taaneqartut tunngavigalugit ataani taaneqartoq **allannguutissatut siunnersuut akuerisassanngorlugu saqqummiuppaa:**


Nannut, aarrit, qilalukkat qernertat qaqortallu piniagaanerinut piffissaliussat pillugit aamma piffissaliussat qanoq atorluarnerusinnaanerannut nalilersuinissamik, kiisalu nalunaarutit attuumassutillit najukkami piniartarnermut aallaaniartarnermullu pissutsinut qanoq naleqqussarneqarsinnaanneranik misissuinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.


Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappassaaniigassanngortippaa.



Nikolaj Jeremiassen,
Siulittaasoq



Karl-Kristian Kruse,
Siulittaasup tullia


Saxtorph Didriksen


Ane Hansen


Hans Enoksen


Knud Kristiansen


Aqqaluaq B. Egede